

EDITORIAL

Labanan ti Task Force Philippines ti imperyalista a US

Rumbeng a sipipigsa a sidiren ken labanan ti binukel ti imperyalista a US a Task Force Philippines nga aramaten daytoy iti nakarkaro a pannakibiang militar iti pagilyan. Iti panangbukel ti Task Force Philippines, ad-adda a garapal a konkontrolen ti US ti Armed Forces of the Philippines (AFP) ken dadduma pay a pwersa a pangseguridad ti estado a neokolonyal tapno agserbi iti heyopolitikal nga interes ti US iti Asia.

Ti Task Force Philippines ket maysa a baro a yunit militar ti US a nakabase iti Pilipinas. Panggep daytoy nga ikeddeng ti direksyon, plano ken dagiti operasyon ti AFP iti “depensa a pangruar” manipud iti South China Sea agingga iti Luzon Strait, laban iti “managpwersa ken agresibo” kano a tignay ti China iti kabaybayan.

Dakkel nga inuulbod ti deklarado a panggep daytoy a “papigsaen ti panagtinnulong ti US ken Pilipinas.” Nakakatkatawa nga inamin mismo ti hepe ti AFP nga awan ti ammo na a detalye ti daytoy a plano a *task force* ti US. Ti laeng ammo na ket nakabasar daytoy iti konsepto ken operasyon ti Task Force Ayungin nga intakder ti US idi napan a tawen.

Naitakder daytoy nga umuna a *task force* idi 2024 ken binukel dagiti upisyal militar ti US. Daytoy ti nagplano kadagiti operasyon a “re-supply” ti AFP iti barko daytoy a BRP Sierra Madre a nakasardeng iti Ayungin Shoal. Inpatulod ti US ti ramit militar ken armas na, ken sinu-



portaran na ti sarbeylans a pangtangatang ken panglawang (*satellite*). Iti ababa a sarita, dagiti “re-supply mission” ti AFP ket dagiti operasyon a pangbaybay a direkta a mandar ken kontrol ti US.

Ti panangbukel ti Task Force Philippines ket kaudyan nga iskema ti imperyalista a US ken tanda ti nangatngato a tukad ti pannakibiang daytoy iti pagilyan. Agserserbi daytoy iti balangkas ti Indo-Pacific Strategy ti US iti plano a palikmutan ti imperyalista a karibal daytoy a China, ken lapdan ti ad-adda a panagpigsa ti bileg daytoy iti militar ken ekonomya.

Manon a tawen nga us-usaren

ken rubrubroban ti US ti susik a pangbaybay ti US ken China, tapno ikalintegan ti panagaramat iti Mutual Defense Treaty ken dadduma pay a saan a patas a katulagan militar tapno papigsaen ti presensya dagiti pwersa militar daytoy iti Pilipinas. Intakder daytoy ti saan a bumaba iti siyam a base militar ti US a mabigbigbig iti sidong ti Enhanced Defense Cooperation Agreement (EDCA).

Ad-adu pay ti saan nga ak-aklunen ti US a base ken pasilidad na iti nadumaduma a paset ti pagilyan, kabilang ti intakder ti AFP a pasilidad iti Mavulis Island idiay Batanes tapno maaramat ti US. Adda met ti

presensya ti militar ti US kadagiti pasilidad idia’y Ilocos Norte, Aurora, Quezon, Mindoro, Panay ken nadumaduma a paset ti Palawan. Aggigyan kadagitoy a pasilidad dagiti upisyal ken soldado nga Amerikano, wenno pagiyis-istayonan kadagiti armas kas ti Typhon *missile system* ken dadduma pay a makadadael nga armas. Balak met ti US nga itakder iti pagilyan dagiti pabrika ti bala, drone ken dadduma pay nga armas. Nasyon pay ditoy ti plano ti US nga agitakder ti *refuelling depot* iti nalawa a kabaybayan ti Davao Gulf.

Permanente met ti presensya dagiti barko a panggubat ti US iti kabaybayan a sakop ti Pilipinas, kabilang dagiti higante nga *aircraft carrier* a nakaluganan ti rinibo a soldado nga Amerikano. Nawaya daytoy nga aglaylayag ken agsangsanglad iti anyaman a paset ti Pilipinas. Maus-usar dagitoy iti agsasaruno ken agrarapin a panagsanay iti gera a maisaysayangkat iti Pilipinas, a puro nakaturong iti senaryo ti panagbettak ti gubat iti China.

Ni Marcos ket napeklan nga aso-asi ita amo na nga imperyalista a US. Ad-adda pay a nagbalin isuna a paspasurot gapu iti desperasyon na nga alaen ti suporta ti US. Daytoy ket iti sango ti agburburek a krisis iti puli-

tika nga intunda ti naibutaktak a higante a kaskaso ti korapsyon ken agtultuloy a nalawa a tignay protesta laban iti rehimen na.

Iti pulong ti ASEAN itay nabiit, ni Marcos ti nagserbi a para-awit iti adyenda ti US, ken induron na ti “enhanced defense cooperation” dagiti pagilyan iti Southeast Asia laban iti “pangta ken agresyon” ti China. Nasupalpal ni Marcos idi awan uray maysa a sumupsuporta iti gakat na.

Umannurot iti mandar ti US, agsasaruno a sinerrek ni Marcos dagiti katulagan a “visiting forces” iti Japan ken Canada, nga agpada a pagilyan nga addaan alyansa a militar iti US. Gagem daytoy a palubosan nga usaren dagitoy a pagilyan ti teritoryo a pangbaybay ken kadagaan ti Pilipinas para kadagiti kasilpo-ti-US nga operasyon a militar. Tatta met ket ipanpanakkel ni Marcos a gumatang isuna kadagiti ramit panggubat iti US tapno kano makalaban iti makabulan sakbay a dumawat ti tulong ti sabali a pagilyan.

Maitunos iti adyenda ni Marcos, agtigtignay ti nadumaduma a maka-US a partido, organisasyon, dagiti institusyon ken paset ti masmidya tapno suportaran ti dumakdakkal a presensya a militar ti US iti Pilipinas,

iti linged ti “panangsalaknib” iti West Philippine Sea. Dagitoy ket bin-ig a ponpondoan ti imperyalismo a US a dumaldalan kadagiti institusyon kas ti National Endowment for Democracy ken agay-ayus kadagiti grupo kas ti “INCITEgov.” Idi 2023, nagilatang met ti guberno a US ti \$1.6 bilyon para iti 5-tawen a programa para iti “propaganda a kontra-China.”

Paypaypayan na met ti Sinophobia wenno ti gura iti amin nga addaan pakainaigan iti China. Kas ken Marcos, parparwaren da nga adda ti pangta ti “panagsakop” ken “agresyon” ti China, ngem naulimek nu kasano a ti Pilipinas ket agtaltalinaed a neokolonya ti imperyalismo a US. Parparwaren da a “maka-China” ti siasinoman a sumupsuypat kadagiti pannakibiang militar ti US iti Pilipinas.

Agpospostura tatta dagiti Duterte a kontra-US tapno gaburan ti pakaseknan ti korapsyon a pakairamanan ti pamilya da. Ubbaw daytoy a postura. Idi adda iti poder, awan ti inaramid ni Rodrigo Duterte tapno ipaserra dagiti EDCA site ken ilayon nga ibasura ti VFA ken dagiti katulagan militar iti US. Winayawayaan na ti soldado nga Amerikano a nangpapatay ken Jennifer Laude. Naulimek tatta dagiti Duterte iti plano ti US nga itakder a *refuelling depot* iti Davao Gulf.

Iti sango ti pumigpisa a duron ti US tapno mangsugsog iti gubat ken guyuden wenno usaren ti Pilipinas iti pananggubat iti China, nairut ti pagkasapulan nga agkaykaysa ti umili tapno agtignay ken labanan daytoy.

Kasapulan a papigsaen ti pukaw ti umili tapno dupraken ti amin a base militar ti US, ikkaten ti amin a misayl ti US kadagiti sikreto a lokasyon iti Pilipinas ken papanawen dagiti makibibiang a pwersa militar ti US iti pagilyan. Nasken nga isilpo daytoy a pukaw iti dangadang ti umili tapno makaruk-at kadagiti kuko ti imperyalismo a sumipsipayot, gun-oden ti panagwaywayas ken ibangon ti pagilyan a nawaya ken nadur-as.



Tawen LVI No. 21 | Nobyembre 7, 2025

Ti Ang Bayan ket maipabpablaak iti lenggwahe a Pilipino, Bisaya, Iloko, Hiligaynon, Waray ken Ingles. Agawawat ti Ang Bayan kadagiti kontribusyon nga artikulo ken damdamag. Maallukoy met dagiti agbasbasa nga agidanun kadagiti dillaw ken rekomendasyon para iti panagdur-as ti pagiwamak tayo.

Linaon

Editorial: Labanan ti Task Force Philippines ti imperyalista a US 1

Panagpakaaso-asi ti rehimen Marcos iti US 3

Higante a protesta kontra kurakot inton Nob. 30 4

Saplit ti bagyo ken kunniber idia’y Cebu 5

Dagiti protesta 5

Dangadang ti mangmangged 5

94th IB, intake ti NPA 5

Pappapigsaen ti Kaguma ti intar na 6

Iti ababa a sarita 7

Kumarkaro a represyon ti rehimen Trump 8

Kumarkaro a kasasaad dagiti Pilipino a migrante 9

North Caloocan, naipasidong iti militarisasyon 9

Pannakibiang ti NTF-Elcac kadagiti unibersidad 10

Isla ti Leyte, dinuprak ti militarisasyon 10

Panaglabsing iti karbengan-tao 10

Ti Ang Bayan ket ipabpablaak ti Komite Sentral ti Partido Komunista ng Pilipinas dua a daras iti tunggal bulan

 ang.bayan@cpp.ph

Aso-aso a rehimen Marcos Jr: Para-itandudo ti imperyalista nga adyenda ti US iti SEA

Idi Oktubre 31, inyanunsyo ni Pete Hegseth, kalihim ti Department of War ti US (sigud a Department of Defense) ti panangitakder ti US ti "Task Force Philippines" iti pulong ti ASEAN Defense Ministers' Meeting (ADMM)-Plus idia Malaysia. Daytoy a *task force* ket buklen ti 60 elemento manipud iti US Pacific Fleet ken idauluan ti maysa nga Amerikano a heneral. Daytoy ket panagpalawa kadagiti operasyon ti US Task Force Ayungin a nakabase idia Palawan ken agdama a mangiturturong iti pannakirisirir ti Pilipinas kadagiti barko a Chinese kadagiti pagaapaan nga isla ken koraes.

Inpablaak ni Hegseth iti publiko ti Task Force Philippines kalpasan a saan nga anamongan ti ASEAN ti gakat na a panangbukel ti maysa a "shared maritime domain awareness program" tapno isentro iti US dagiti datos-paniktik laban iti China. Saan a kimmagat dagiti pagilyan iti gakat iti laksid ti diaya ti abante a teknolohiya a *drone* kas kadagiti *unmanned* a lugan a pangtangatang ken pangbaybay kasukat ti kooperasyon.

Maysa laengen nga "Indo-Pacific Chiefs of Defense Cooperation Council" ti binukel ni Hegseth, karaman ti paspasurot nga aso-aso na a ni Gilbert Teodoro, ken dagiti kalihim iti depensa ti Australia ken Japan iti panagpulong da idia Malaysia idi Nobyembre 1. Awan ti baro iti daytoy a konseho gapu ta ti uppat a pagilyan ket addaanen ti agrarapin a "kooperasyon" iti langa dagiti *bilateral*, *trilateral* ken *multilateral* a katulagan a militar.

Para-itag-ay ti imperyalista nga adyenda

Sakbay ti anunsyo, nagiyebkas ti panagdanag dagiti kabangibang a pagilyan ti Pilipinas iti bitla ni Ferdinand Marcos Jr iti ASEAN idi Oktubre 28 nu sadinno nga immawag isuna para iti "enhanced defense cooperation" kadwa ti Japan ken US laban iti "seryoso a pangta ti agresyon ti China" iti rehiyon.

Ballaag ti *prime minister* ti Malaysia a ni Anwar Ibrahim, "saan nga agpaiduyos kadagiti eksternal a pwersa" tapno risuten dagiti internal a susik. Kuna ni Ibrahim, nasken nga agpada a liklikan ti pa-

nagpilit ken riribuk para iti istabilidad ti rehiyon. Inallukoy na dagiti pagilyan nga idalan iti dayalogo, kooperasyon ken natalinaay a pamuspusan ti panangresolba kadagiti pakaseknan maitunos kadagiti prinsipyo ti ASEAN. Nagiyebkas ti panagdanag ti Indonesia, Laos ken Cambodia iti ad-adda pay a panagbarat ti tensyon iti kabaybayan gapu iti agresibo a panangkarit ni Marcos iti China.

Itay nabiit, inwasiwas pay ti kumader ti AFP a ni Romeo Brawner ti kabaellan ti Typhon Missile System a "danunen ti China." Nakaistasyon ti nasao a sistema ti misayl iti amyanan a paset ti Luzon, asideg iti Taiwan. Maibilang daytoy nga opensiba a panagpostura ken paset ti pannakibiang ti US iti pang-uneg a paka-

seknan ti Taiwan ken China.

Base ti imperyalista a makinarya iti gubat

Babaen ti napeklan nga aso-aso nga estado daytoy, ti Pilipinas laeng ti pagilyan iti Southeast Asia a mangipalpalubos ti nabayag a panagbase dagiti gangannaet a tropa ken dagiti armas da iti kadagaan ken kabaybayan daytoy. Kasta met a ti pagilyan laeng ti addaan kadagiti pormal a katulagan militar iti US a kas ti Mutual Defense Treaty ken Enhanced Defense Cooperation Agreement iti rehiyon. Pakakitaan ti napeklan a panagpakaaso-aso daytoy, binukel ti AFP ti Strategic Command tapno pagkaykaysaen ti nadumaduma a sangay daytoy tapno ad-adda a paannayasen ti ayus ti kumand ti US iti uneg daytoy.

Kadagiti sumaruno a bulan, saan laengen a dagiti tropa nga Amerikano ti palubosan ti rehimen Marcos nga agbase iti Pilipinas. Addan iti negosasyon ti panangitakder ti Japan ken Australia, dagiti mayor nga alyado ti US, ti bukod da a base ken imbakan iti pagilyan. Nayon iti US, uppat a pagilyanen ti mapalpalubosan a mangiruar-serrek ti tropa, ramit ken lugan umannurot kadagiti nabukel a *visiting forces agreement* (VFA). Kaudyan ditoy ti VFA a kabilang ti Canada a napirmaan idi laeng Nobyembre 2.

Awan-sarday ken agsublat ti presensya dagiti gangannaet a tropa iti pagilyan iti langa ti awan patengga a *war games*, *multilateral maritime exercise*, "panagbibinnigay" ti kapadasan ken dagiti operasyon a sibil-militar. Us-usaren dagitoy uray dagiti agsasaruno a didigra a mapadpadasan dagiti Pilipino, kas ti gingined ken layus, tapno pagbalinen a "normal" iti umili ti presensya ken pannakibiang da kadagiti pang-uneg a pakaseknan ti pagilyan.



Higante a protesta ti umili kontra kurakot, maisagsagana para inton Nobyembre 30

Naituding a mairuswat ti maysa a higante a protesta ti umili kontra korapsyon iti Luneta Park idia y Manila ken dadduma pay a paset ti pagilyan inton Nobyembre 30. Ti tignay ket idaulwan ti baro a takder a Kilusang Bayan Kontra Kurakot (KBKK) nga inbunga ti protesta ti 100,000 indibidwal iti naawagan a Layus iti Luneta idi Setyembre 21. Ti awag ti grupo: "Amin a karaman, rumbeng nga agsungbat!"

Segun iti KBKK, iti laeng panagpasungbat iti amin a karaman iti anomalya a magibusan ti sistematisiko a korapsyon a mangpespeste iti umili. Kabilang iti "amin" ni Presidente Marcos a nangbukel ken nangaprubar iti tinawen a badyet a natatek ti anomalya ken ni Bise Presidente Duterte a nakasaklang iti pananggastar iti ginasut a milyon a *confidential and intelligence funds*.

Iti intero a Nobyembre, linawas nga isayangkat dagiti kameng ti KBKK ti Black Friday Protest, dagiti piket ken panagkalampag kadagiti komunidad, unibersidad, pabrika, palengke ken kadagiti paguummungan ti umili. Idaulwan met daytoy dagiti porum, dadakkel a pulong ken panangiyukrad kadagiti istrimer tapno danunen ti ad-adu a Pilipino.

Idi Oktubre, agsasaruno dagiti inyaramid a protesta ken aktibidad dagiti organisasyon iti sidong ti KBKK. Nagmartsa manipud Liwasang Bonifacio agturong Mendiola idia y Manila ti rinibo a mannalon, karaman ti dadduma a demokratiko a sektor idi Oktubre 21. Panawagan da ti pudno a reporma iti daga ken panagpasungbat iti rehimen Marcos iti kunniber. Napasamak met dagiti tignay idia y Cebu, Bacolod, Davao ken Santiago City idia y Isabela, ken kadagiti prubinsya ti Southern Tagalog ken Panay. Simmuporta kadagiti mannalon ken nagisayangkat ti "global kalampagan" dagiti migrante a Pilipino manipud iti US, Canada, Australia, United Kingdom, Japan, Hong Kong ken South Korea.

Idi Oktubre 24 nga inyaramid ti Bayan-NCR ti Black Friday Protest kadagiti syudad ti Manila, Quezon, Taguig ken Valenzuela. Naangay

met ti kapada nga aktibidad idia y Laguna ken Albay. Dinarp met dagiti kameng ti Kalikasan-PNE, People Surge ken Kadamay ti *compound* idia y Taguig City a pagup-upisinaan ti ICI.

Idi Oktubre 27, nagurnong idia y San Juan City dagiti obispo, padi ken pastor manipud iti nadumaduma a denominasyon a nakabase idia y National Capital Region tapno ibangon ti Church People Against Corruption. Kabigatanna, nagprotesta dagiti balangay ti Gabriela iti Nailyan nga Aldaw ti Protesta dagiti Babbai.

Idi Oktubre 30, nagprotesta dagiti mangmangged iti salun-at idia y Quezon City tapno kundenaren ti korapsyon ken umawag ti nayon a sweldo, panagbayad kadagiti benepisyo ken nayon a tauhan kadagiti ospital ti gubyrno. Nagtignay met dagiti estudyante iti UP-Tacloban ken University of Eastern Philippines idia y Northern Samar.

Idi Oktubre 31, balbaliw a nagmartsa dagiti grupo iti sidong ti Bayan iti Mendiola idia y Manila. Insayangkat met iti didia y nga aldaw ti Concerned Artists of the Philippines ti #StopKorap Halloween Party nga addaan tema a "Ghost Projects: The Exorcism!" idia y Quezon City. Napasamak met ti Black Friday Protest idia y Caloocan City ken Pasig City, San Pablo City idia y Laguna ken Cagayan de Oro City.

Pangil ti pasismo

Iti sango ti lumawlaw a pungtot ti umili, tuloy-tuloy ti panaggandat ti rehimen Marcos a pawilan ken kigtoten ti kabataan. Idi Nobyembre



3, naganunsyo ti Philippine National Police-Criminal Investigation and Detection Group (PNP-CIDG) a nagipila daytoy kadagiti kaso iti 97 a saan a nanaganan nga indibidwal kanaig ti protesta idi Setyembre 21 a nagmurdong iti naranggas a panagipawil dagiti pulis.

Nayon kadakwada, uppat a lider-estudyante manipud iti University of the Philippines-Diliman, Polytechnic University of the Philippines ken De La Salle-College of St. Benilde ti pinatulodan ti PNP-CIDG ti *subpoena* tapno ipasidong iti imbestigasyon. Nagkedked dagiti lider-kabataan a sumango kadagiti pulis. Maysa met a protesta ti inangay da idi Oktubre 27 iti hedkwarters ti PNP idia y Quezon City tapno batikusen dagiti *subpoena*.

Malaksid ditoy, sangapulo kadagiti naaresto a 270 nga indibidwal idi Setyembre 21 ti inrekomenda ti prosekyutor iti Manila a pormal a sumango iti kaso a *tumult and other disturbances of public order*. Kabayatanna, naibasura dagiti reklamo nga iligal nga asembliya ken *direct assault* a naipila kadagiti naaresto gapu iti kinaawan ti naan-anay nga ebidensya.

AB

Korapsyon ken panagkwari idiy Cebu, nagresulta iti trahedya

DUMANDANONEN ITI 139 ti nailista a pimmusay idiy Cebu idi Nobyembre 7 gapu iti napigsa a panaglayus gubway ti nalabes a panagkwari iti kabanbantayan ti isla, a pinakaro ti nangato a bolyum ti tudo nga awit ti Bagyo a Tino. Kaadwan ti nailista a pimmusay idiy Liloan ken kadagiti syudad ti Talisay, Mandaue ken Cebu, dagiti lugar a rumbeng koma nga adda ti nakatakder nga imprastruktura a *flood control*, kabilang dagiti proyekto a kinontrata dagiti kumpanya dagiti Discaya. Mai-kadwa ti Cebu iti addaan kaadwan a proyekto a *flood control* iti pagilyan nga aggatad ti ₱26 bilyon.

Iyaw-awag dagiti Cebuano ti hustisya kadagiti nadadael nga intunda ti kinapalpak dagiti proyekto a *flood control*, ken sungsubatan kadagiti kunniber a lokal ken nailyan nga upisyal ng gubyrerno.



Piket kontra panagngato iti singir ti danum. Nagpiket ti Bayan-Panay iti upisina ti Metro Iloilo Water District idiy Iloilo City idi Oktubre 20 tapno babalawen ti naituding a panagngato ti singir ti danum. Ti Metro Pacific Iloilo Water ket agingato ti singir a 26% agturong ti ₱25.2 kada metro kubiko iti Nobyembre ken agbalin a ₱28.67 kada metro kubiko inton Marso 2026, manipud iti agdama a ₱20 kada metro kubiko.

NCIP iti Pampanga, pinampag dagiti Ayta. Nagturong dagiti katutubo nga Ayta ken dadduma pay a sektor iti upisina ti NCIP Regional Office idiy San Fernando, Pampanga idi Oktubre 23. Nagipeksa da ti panagsupyat kadagiti proyekto nga agkamkamkam iti ansestral a daga da kas kadagiti operasyon a kwari, minas, *golf course* ken *solar farm*. Sakbay ti tignay, intakder dagiti Ayta ti organisasyon da a Mansaway ken ti Pamilalamu a timpuyog dagiti katutubo ken simbaan.

Kabataan a Mindanaoan para iti Palestine. Nagiruswat ti tignay dagiti estudyante iti Mindanao State University-Iligan Institute of Technology idiy Iligan City ken University of Science and Technology of Southern Philippines idiy Cagayan de Oro City idi maudi a lawas ti Oktubre kas pannakikaykaysa iti umili a Palestino. Binabalaw da ti henosidyo ti Zionista nga Israel ken ti imperyalista a US laban kadagiti Palestino iti Gaza.

Panagsupyat iti pribatisasyon iti tyendaan idiy Baguio City. Nagtignay dagiti residente ti Baguio City idi Oktubre 26 tapno supyaten ti pribatisasyon wenno inawagan da a "mallification" ti SM Prime Holdings ken lokal a gubyrerno iti pangpubliko a tyendaan iti syudad. Nagisayangkat dagiti grupo ti nadumaduma nga aktibidad kas panawagan para iti inklusibo ken nakasentro iti komunidad a panagdur-as iti syudad.



Laban ti mangmangged iti Wyeth Philippines. Balbaliw a nagprotesta dagiti mangmangged iti panangiyuna ti Wyeth Philippines Progressive Workers Union-DFA-KMU iti sango ti planta ti kumpanya idiy Cabuyao City, Laguna idi Oktubre 24. Kinundenar da ti agtultuloy a panagkedked ti kapitalista a sungbatan ti awag da para iti nainkalintegan a sweldo ken regularisasyon iti dandani uppat a bulanen a negosasyon para iti *collective bargaining agreement* (CBA).

Sweldo ken karbengan, panawagan a respetaren idiy Kowloon. Nagpiket dagiti mangmangged ti Kowloon House West iti ruar ti restawran idiy West Avenue, Quezon City iti panangiyuna ti Kowloon House West Chapter ti Glowhrain-KMU idi Oktubre 24. Kinundenar ti unyon ti inawagan daytoy nga agdadata a saan panangbigbig ti maneydsment iti karbengan dagiti mangmangged ken panaglabsing iti CBA da. Segun iti unyon, napaay ti restawran nga ipatungpal dagiti prubisyon ti CBA kas ti *across-the-board* a pangngato ti sweldo maitunos iti mandar ti *regional wage board* ken usto a proseso kadagiti kaso ti panagdisiplina. Saan met a mangmangted daytoy ti kaskenan a benepisyo ken proteksyon.

2 unyon iti UA&P, agsagsagana nga agwelga. Nagisumite ti ulat ti *strike vote* ti University of Asia and the Pacific (UA&P) Union of Faculty Members ken UA&P Union of Allied Employees iti National Conciliation and Mediation Board (NCMB) idi Oktubre 27. Sungbat daytoy ti dua nga unyon iti panagkedked ti administrasyon ti unibersidad iti panawagan a nayon a sweldo, benepisyo ken nasayaat a kasasaad iti trabaho. Uppat a bulanen ti pannakiareglo dagiti unyon iti administrasyon iti tukad ti NCMB ngem agtaltalinaed a natangkem ken tuleng daytoy iti awag da.

94th IB, inatake ti NPA

NAGISAYANGKAT TI OPERASYON a haras ti New People's Army (NPA) -South Central Negros (Romeo Nanta Command) laban iti tropa ti 94th IB idiy Sityo Cantupa, Barangay Buenavista, Himamaylan City, Negros Occidental idi rabii ti Oktubre 27. Saan a bumaba iti dua ti nasugatan kadagiti berdugo a soldado.

Nagtataray dagiti soldado ken mano a segundo pay sakbay da a nakabales ti putok. Waradiwad a nagpatudo ti bala iti erya ti 94th IB usar ti masinggan da ken nagpaputok da ti M203.

Kabayatanna, naiyulat a simmuko iti NPA-Southwest Negros (Armando Sumayang Jr Command) ti sumagmamano nga ahente nga intel ti 15th IB iti ili ti Cauayan idi Oktubre. Inawat ti yunit ti panagsuko dagiti aset iti basaran nga awan ti dangran ken utang da a dara iti rebolusyonaryo a tignay ken umili.

Iti anag ti tignay panagilinteg

Pappapigsaen ti Kaguma ti intar dagiti rebolusyonaryo a manursuro

Mapanggeddeng a rimrimba-wan ti Katipunan ng mga Gurong Makabayan (Kaguma) dagiti nagkapuyan ken nagkamalian daytoy kadagiti napalabas a tawen, iti inspirasyon ti tignay panagilinteg ti rebolusyonaryo a tignay. Pammaneknek daytoy ti panang-angay ti rebolusyonaryo a grupo dagiti manursuro ti Maikapat a Nailyan a Kongreso da idi Oktubre.

Nagurnong ti saan a bumaba iti 79 a kameng manipud kadagiti bala-ngay ti Kaguma manipud iti nadumaduma a rehiyon, akademiko nga institusyon ken unibersidad iti sektor ti edukasyon para iti kongreso. Nagkaykaysa dagiti delegado iti tema nga "Abante rebolusyonaryo a tignay ti manursuro! Agilinteg! Agpalawa! Makidangdang! Agballigi! Ipan amin a kabaelan nga iyabante ti demokratisiko a rebolusyon ti umili nga addaan sosyalista a perspektiba!"

Nasurok dua a dekadang ti napalabas manipud idi nairuswat ti maudi a kongreso ti grupo. Dagiti umuna a kongreso daytoy ket naaramid idi 1985, 1987 ken 2003. Naitakder ti grupo idi Marso 28, 1971.

"Balbaliw nga ibangon ti Kaguma, agresibo nga agpalawa ken agpapigsa iti intero a pagilyan. Sipipinget nga iyabante dagiti komprehensibo a rebbengen para iti rebolusyon," segun iti Nailyan a Kalihiman iti ulat daytoy iti panagrugi ti kongreso.

Iti taripnong, inyulat ti kalihiman ti panagsuma ti Kaguma iti bukod daytoy nga organisasyon iti napalabas a dua a dekada. Nalatak ditoy ti napakumbaba a panagdillaw iti bagi iti panagibbat da iti basaran a prinsipyo ti rebolusyonaryo nga organisasyon ken kadagiti wagas daytoy kadagiti napalabas a tawen.

Naipinal ken napagkaykaysaan ti kongreso dagiti napateg a dokumento ti Kaguma kabilang ti oryenta-



syon, pamunganayan lininteg ken tallo a tawen a takikal a plano daytoy. Nabalangkas iti kongreso ti innem a resolusyon a tumarabay iti tuluy-tuloy a panagabante ti organisasyon.

Nagbotos met ti kongreso ti baro a Nailyan a Konseho ken Nailyan a Komite nga Ehekutibo a tumakder a daulo ti organisasyon iti intero a pagilyan. Napili ni Guia Umili kas pangulo ken tagapagsarita ti Kaguma.

Kinablaawan ti National Democratic Front of the Philippines ken Communist Party of the Philippines (CPP) ti panggeddeng ken panagpursigi ti Kaguma iti panang-angay ti Maikapat a Nailyan a Kongreso daytoy.

"Mangnamnama kami nga iti daytoy a kongreso ket makonsolida yon ti intar yo, makaadaw kadagiti adal manipud kadagiti kapadasan ken naitibtker nga umabante iti panagtungpal kadagiti rebbengen iti panangpappigsa ti rebolusyonaryo nga intar dagiti manursuro," pablaak ni Elias Dipasupil, kabuklan a kalihim ti NDFP.

Segun ken Marco Valbuena, pangulo nga upisyal iti impormasyon ti CPP, awan dudua nga istorikal ti nairuswat a kongreso, saan laeng a gapu ta naangay daytoy kalpasan ti atiddog a panawen, nu di ket gapu ta sigurado a rugi daytoy ti baro a panawen ti panagabante iti nangatngato a tukad ti rebolusyonaryo a tignay ti manursuro.

Kuna ni Valbuena, ti Kaguma ket

agserserbi a raya para kadagiti manur-

suro a mangmangted lawag iti dana a rumbeng da a dalyasaten tapno magun-od ti tarigagay da iti intero a pagilyan. "Iti panagpinget yo, ik-ikkan yo ti inspirasyon dagiti manursuro tapno tuman-aw labes iti agdama a kinarigat, ken makikaykaysa iti dangadang ti nalawlaw nga umili tapno naan-anay a baliwan ti urnos ti gimong," mensahe na iti Kaguma.

Iti panagleppas ti kongreso, sangsangkamaysa a nagsapata dagiti kameng ken dagiti baro a nabotosan a dadaulo a sinaruno ti panggibus a panagsarita ti pangulo. Iti bitla na, bingbig ken pinadayawan ti pangulo a ni Umili dagiti martir ti sektor ken ti umili. "Isuda a nagidaton ken nagibuwis ti sibubukel a biag para iti rebolusyon. Padayawan tayo dagiti kadwa tayo nga adda iti kaaw-awayan, ken mangig-iggem ti nangato a klase ti dangadang," kunana.

Nagibati met ti karit kadagiti delegado ti kongreso ni Umili: "Sapay koma ta agtuloy a pumigsa ti panagsilpo ti rebolusyonaryo a teorya ken praktika tayo; sapay koma ta dagiti dokumento ken innadal ket saan a nakasardeng a kaamwan a nakaimbak laeng iti panunot tayo nu di ket agbalin a tarabay iti panangpadur-as ti panagtignay tayo ken ti panagtignay met ket iduron tayo iti nangatngato a tukad ti rebolusyonaryo a teorya."

AB

PORK BARREL ni MARCOS

₱15.9 BILYON

kabuklan a *confidential and intelligence funds* (2022-2025)

₱2.1 TRILYON

kabuklan nga *unprogrammed allocations* (2023 -2025); nu sadinno a ₱214.4 bilyon ket nailatang iti 3,700 *flood control projects*, kaadwan ket naanomalya ken *ghost*.

188

pimmusay ken 135 ti mapukpukaw, kaadwan iti Visayas gapu ti napigsa a panagtudo ken panaglayus nga awit ti **Bagyo a Tino**. Adda ti 127,827 pamilya ti napilitan nga agbakwit manipud kadagiti komunidad da.



₱1.79 bilyon

pondo a naibusbos iti *substandard a flood control project* iti **Bunawan River** idia Davao City manipud 2016 agingga 2024. Adda dagiti paset daytoy a saan a nalpas agingga tatta.

Nagtaudan: Kilab Multimedia

1 iti tunggal 5

Pilipino iti edad 10-64 ket *functionally illiterate*. Kabaelan da ti agbasa ken agsurat ngem saan a maaramat daytoy iti inaldaw-aldaw a biag.

Nagtaudan: Philippine Statistics Authority/Functional Literacy, Education and Mass Media Survey

3,000 ▶

mangngalap idia Bais City ken Manjuyod ti nadangran ti pagbiagan da gapu iti pannakaibuyat ti kemikal nga ethanol manipud iti **URC Sugar and Renewables Group Distillery Plant** idi Oktubre 24; sinabidong ti kemikal ti nabaknang a kadanuman ken kinabaknang ti baybay ti Tañon Strait.




15 milyon

Venezuelan ti nagpalista manipud Agosto tapno balbaliw nga itakder ti **Bolivarian Militia** iti intero a pagilyan. Panangipakita daytoy a "nakasagana, aktibo ken armado" ti pwersa a milisya a salakniban ti nailyan a teritoryo ti Venezuela iti sango ti pammutbuteng ken pangta ti panagraut ti US.

14 tawen

ti napalabasen manipud idi pinatay ti paramilitar ti AFP ni **Fr. Pops Tentorio**, salaknib ti karbengan dagiti Lumad ken kalikasan, idi **Oktubre 17, 2011**.



Ti kumarkaro a pasista a panagipawil ti rehimen Trump iti umili ti US

Sangapulo a bulan pay laeng manipud idi balbaliw nga agtugaw ni Donald Trump iti turay ket dumandanon iti baro a tukad ti irteng ti kontra-umili ken kontra-demokratiko a patakaran na.

Ipenpennek na ti panangaramat ti turay na kas presidente ti US. Agpospostura isuna nga ari ken dikta-dor nga agar-aramid ti amin a kayat na nga awan sungsubatan na. Sipaparang nga iturturong na ti administrasyon na iti panagari a pasista ken diktadura. Sipaparang met a bekbekkelen na dagiti waya-way a ken karbengan a sibil ti umili ken badbaddekan na dagiti bukod na a linteg, proseso ken institusyon.

Iti panagpostura a diktador, araramaten ni Trump dagiti pwersa a militar (US Marine ken National Guard) tapno parukmaen dagiti *sanctuary state* wenno dagiti estado a mangbigbigbig iti karbengan dagiti imigrante. Idi Setyembre, inye-bkas ni Trump ti plano na nga usaren ti militar tapno pawilan da-giti panaglabaan kadagiti patakaran na. Kunana, awan ti nagdumaan da-giti tao a sumupsupyat iti rehimen na kadagiti kabusor ti US iti sabali a pagilyan.

Inikkan ni Trump ti Immigration and Customs Enforcement (ICE) ti "kota" a 3,000 a panag-aresto kadagiti imigrante tunggal aldaw ken inikkan na ti awtorisasyon ti panagaramat ti karanggasan ken brutal a pamuspusan. Ti siasinoman a mangbatbatikos ken Trump, dagiti "agruprupa nga imigrante" ken da-giti aktibista ket puntirya ti panag-bugbog, pammaltog, panagkamat ken deportasyon.

Dimmanunen iti 23 indibidwal ti pimusay bayat nga adda da iti kustodiya ti ICE, kaadwan ket gapu iti panangipaidam ti atensyon a me-dikal. Adda iti 515,000 nga indibid-wal ti napadeport ken adda iti 1.6 milyon nga imigrante ti inkapilitan a nagtalaw wenno boluntaryo a pim-manaw tatta a tawen. Dandani 60,000 ti iligal a nakabalud kadagiti

pasilidad ti ICE nu sadinno a maka-padpadas da ti panagabusu, panag-maltrato ken kinaawan ti serbisyo a medikal.

Iti kinaagum na iti turay, ma-non a daras nga inye-bkas ni Trump ti intensyon na a balbaliw a tuma-ray kas presidente iti maikatlo a termino iti anyaman a pamuspusan, uray labsing iti konstitusyon ti US. Impatugaw na iti turay dagiti alya-do ken bukod na nga abogado, ba-yat nga indarum, kinamat ken inik-kat na iti trabaho ti amin a lumab-laban ken saan a sumursurot kada-giti kapritso na. Pilpiliten na nga agrukma kadagiti kayat na dagiti kumpanya ti midya, husgado, dagiti ahensya ti guberno, dagiti kritiko ken dagiti unibersidad.

Pinairteng met ni Trump ti ga-ngannaet a pannakibiang ti US. Ba-baen ti panagsuplay kadagiti misayl ken armas iti Zionista nga estado ti Israel, aktibo a makikumkumplot ni Trump iti henosidyo laban kadagiti Palestino. Sinugsogan na ti panag-raut ti Israel iti Iran idi Hunyo ken inmandar na ti panagitenag ti da-dakkel a bomba idia. Indeklara na ti plano a rauten ti Venezuela tapno pwersaan a padisyen ti anti-imper-yalista a presidente a ni Nicolas Maduro. Agtultuloy ti pannakigubat ti US iti Russia nga isasaup ti Ukrai-ne. Lumawlaw a lumawlaw ti pannakibiang daytoy iti Taiwan ken Pilipinas.

Garapalan nga us-usaren ni Trump ti pusisyon na tapno ad-ad-da pay nga agakup ti kinabaknang. Pinilaan na ti kaso a "fake news" ti maysa a kumpanya ti midya tapno laeng umawat ti mano a milyon a dolyar a "pannakiareglo." Sirarag-sak nga inawat na ti maysa a *jumbo jet* nga agbalor ti \$400-milyon ma-nipud iti guberno ti Qatar kas "do-

nasyon" a mapan iti sanikwa na kalpasan ti termino na. Idi Oktubre, inpetteng na iti tao na iti De-partment of Justice a kasapulan a bayadan ti ahensya isuna ti gatad a \$230 milyon a kumpensasyon gapu kano iti panaglabing daytoy iti karbengan na idi imbestigaran isu-na ti guberno idi 2023 ken 2024.

Iti agdama, nakapasidong iti "shutdown" wenno nakaserra ti guberno ti US gapu iti saan a pa-nagtutunos dagiti konggresista ka-naig iti badyet ti estado para iti 2026. Saan a bibiangan ti rehimen ti mapadpadasan a panagsagaba dagiti empleyado ti guberno nga agtrababaho nga awanan sweldo, wenno iti maib-ibusen nga ayuda a taraon para kadagiti pamilya nga umaw-awat laeng ti minimum a sweldo. Ketdi, makumikom isuna iti panangibangon ti 90,000 metro kwadrado a *ballroom* (pagsasalaan) iti White House nga aggatad ti \$300 milyon, a plano na nga ipana-gan iti bagbagi na.

Agal-alimpatok ti pungtot ti umili ti US iti rehimen Trump. Uray dagiti sigud a simmuporta kenkuana ket nagipasimudaag metten ti luk-saw ken pannakadismaya iti pana-gimaton na. Awan pay makatawen na iti akem ngem kayaten a padi-syen isuna dagiti Amerikano.

Pumigpigs a ti pukkaw ti umili nga Amerikano: Padisyen iti trono ni Trump! Ginasuten a protesta ti nairuswat iti nadumaduma a paset ti US tapno kundenaren dagiti kontra-umili a patakaran na. Nagti-tipon dagiti komunidad tapno sa-lakniban dagiti imigrante manipud iti naraggas a panagkamat ti ICE.

Dimmanun iti pito a milyon ti dimmar-ay iti protesta a "No Kings" idi Oktubre 18 tapno ipakita ti dis-gusto da iti pasista ken kontra-umili a panagimaton ni Trump. Daytoy ti kadakkelan a tignay iti pagilyan tatta a tawen. Daytoy met ti mai-

Suruten iti panid 9

Kasasaad dagiti Pilipino a migrante, kumarkaro

Kadagiti napalabas a lawas, agsasaruno dagiti ulat ti naka-kaasi a kasasaad dagiti Pilipino a migrante a naranggas a makamkamat, maab-abuso, maidepdeport ken mapapaidaman ti hustisya ken karbengan. Iti panagirteng ti sangalubongan a krisis iti ekonomya, isuda ti pagdasdas-alan ti reklamo a panag-agaw ti trabaho, mapabpabasol iti implasyon ken panagngato ti tantos ti krimen kadagiti ayanda a pagilyan.

Idiay Canada, Japan ken Korea, imminget ti panagkamat kadagiti imigrante gubway ti kontra-migrante a polisiya ken kumarkaro a kultura ti rasismo ken *xenophobia* wenno nakaro a panagbuteng ken disgusto iti gangannaet.

Idiay Taiwan, dumanon iti 169 ti nailista a bilang ti panag-rames iti intar dagiti migrante a mangmangged iti pagilyan idi napan a tawen, nu sadinno a 22 kadagiti biktima ket Pilipino. Mayorya kadagiti biktima ket agtrabtrabaho kadagiti pabrika ken kas *domestic helper*.

Idiay US, 143 Pilipino a marino ti naideport manipud idi napan a tawen. Idi Setyembre, kinanselar ti embahada ti US iti Pilipinas dagiti aprubadon a US *visa* dagiti marino a pumanaw pay laeng iti pagilyan. Kas kadagiti naipadeport a marino, inusar ti embahada a rason ti pammabasol a kaso a *child pornography* uray awan ti ebidensya wenno imbestigasyon a naaramid.

Idiay Thailand, nasurok sangagasut a Pilipino a biktima ti "scam-hub trafficking" ti nakadanunen iti pungto ti Myanmar ken agkasapulan ti madagdagus nga arayats ken aksyon.

Idiay Kuwait, saan a naan-anay a hustisya ti nagun-od ti pamilya ni Dafnie Nacalaban, maysa a *domestic helper* a pinatay ti amo na. Napatawan laeng ti 14 tawen a pannakabalud ti nasao nga amo a nababa a sentensya para iti krimen na.

Idiay The Netherlands, naipaidam met ti hustisya iti 11 a Pilipino a migrante a mangmangged iti desisyon ti Public Prosecution Service nga ibasura ti reklamo da a *human trafficking* laban iti Saints and Stars Gym a nakabase idiay Amsterdam.

Ti nakaam-ames a kasasaad dagiti migrante ket direkta a bunga ti *labor export policy* ti reaksyunaryo a gubyrno a Pilipino. Patpatibkeren daytoy a patakaran ti panagbanyaga dagiti mangmangged a Pilipino imbes a sungbatan ti problema ti kinaawan ti trabaho, makabiag a sweldo ken disente a serbisyo sosyal. AB

Manipud iti panid 8

katlo a nailyan a protesta tatta a tawen.

Aktibo a makipaspaset dagiti demokratiko nga organisasyon dagiti Pilipino kadagiti tignay iti US. Nagisayangkat da kadagiti kampanya, iti sidong ti Tanggol Migrante Movement, tapno iyawag ti panangwayawaya, ikkan ti proteksyon ken serbisyo dagiti ilegal a naibalud a Pilipino a migrante ken singiren ti gubyrno a Marcos iti sungsungbatan daytoy a protektaran dagiti Pilipino idiay US.

Iti Nobyembre 8, iti umuna a tawen ti panangabak iti eleksyon ni Trump, naituding nga agisayangkat ti protesta ti nadumaduma a tsapter dagiti organisasyon iti US iti panangiyuna ti Bagong Alyansang Makabayan. AB

North Caloocan, at-atakaren ti 12th CMO ken NTF-Elcac

Makabulanen a kibkiboren ti 12th Civil Military Operation (CMO) Battalion ken NTF-Elcac dagiti residente ti North Caloocan. Agsusumbangir ti inaramid daytoy a *Red-tagging*, panagespiya ken panaglipit nangruna kadagiti kameng ti progresibo nga organisasyon kadagiti barangay.

Umuna a naideploy ti batalyon iti Barangay 181-182, Pangarap Village idi Oktubre 3 iti lingged ti Community Support Program. Plano ti militar a lapdan ti panaglaban ti umili a sumangsango iti pangta ti demolisyon manipud iti pamilya nga Araneta.

Nangrugi nga agkampo ti 12th CMO iti pangidaulo ni 2nd Lt. Julie San Jose iti likod ti *covered court* ti Barangay 175, Camarin idi Oktubre 6, iti lingged ti kapya ken talinaay. Kalpasan ti mano nga aldaw ket sinakop ti operasyon da ti Barangay 187-188 Tala.

Idi Oktubre 28, sinerrek dagiti nagpabigbig a pulis ti upisina ti Gabriela-Caloocan. Nagdeklara da nga adda awit da a *warrant of arrest* ngem awan ti naipakita da a dokumento. Iti kapada nga aldaw, impaawag ti militar ken kapitan ti barangay dagiti kameng ti Gabriela-Matarik iti barangay *hall* nu sadinno nga inakusaran da isuda a rekruter ti rebolusyonaryo nga organisasyon.

Inusar met ti NTF-Elcac ti asembliya ti barangay idi Oktubre 18 tapno agipasaknap ti kamali nga impormasyon ken i-*Red-tag* dagiti organisasyon ti masa. Sipaparang dagiti panagespiya ti militar kadagiti tignay protesta laban iti korapsyon dagiti progresibo a grupo, a naisayangkat idiay Kiko Palengke ken idiay UCC Congressional Village idi Oktubre 10 ken 17.

Agdandanag ti Defend Caloocan a balbaliw a piliten ti militar dagiti kameng ti progresibo a grupo ken dagiti residente a "sumuko" kas ti inaramid ti 12th CMO iti United Vendors Alliance idi 2024.

Ti militarisasyon a mapaspasamak idiay North Caloocan ket maitunos iti National Action Plan for Unity, Peace and Development. Segun iti programa a Capacitating Urban Communities for Peace and Development nga idauluan ti Department of the Interior and Local Government, dagiti komunidad iti kasyudadan nga addaan nakatakder a patriyotiko nga organisasyon ket maipasasidong iti sarbeylans, panaglipit ken represyon ti PNP ken AFP. AB

**Pannakibiang ti NTF-Elcac kadagiti unibersidad,
papaayen dagiti estudyante**

SIRIRIING KEN MILITANTE a papaayen dagiti kabataan ken estudyante ti gandat a pannakibiang ti National Task Force-Elcac ken dagiti mabaybayadan a traydor a rebolusyonaryo a tignay kadagiti unibersidad iti linged dagiti "porum" ken "akademiko a diskusyon."

Idiay UP Mindanao, nag-walkout dagiti lider-estudyante iti kampus iti porum ti TAGBO 2025 idi Oktubre 26 gapu iti panagsingit ken panagsarita ni Arian Ramos, traydor iti rebolusyonaryo a tignay ken maysa kadagiti kadaksan a salaknib iti NTF-Elcac ken Armed Forces of the Philippines. Ni Ramos ken dagiti pada na a traydor ti mangidadaulo iti *Red-tagging* dagiti lehitimo nga organisasyon ti estudyante ken kadagiti lider da. Nagipatulod ni Ramos ti "bodyguard" nga ahente nga espiya a nangitunda ti nakaro a panagdanag dagiti estudyante.

Dinayaw ti Council of Student Leaders (CSL) ti unibersidad iti panag-walkout dagiti estudyante. Binabalaw da met ti administrasyon ti UP Mindanao a nangipalubos iti pasamak a kunada a maysa nga "isolated" wenno bassit laeng nga insidente. Kunada, mangipakita daytoy iti "pagkapuyan iti institusyon" a siguden a binabalaw da. Nasurok 30 organisasyon a pang-estudyante ti UP Mindanao ti nagpirma iti pablaak ti CSL.

Idiay UST, napaatras ti kolektibo a panagkundenar dagiti estudyante ti partisipasyon koma ti NTF-Elcac iti porum a "Preventing Terror Grooming: The Philippine Experience." Segun kadagiti progresibo a grupo iti kampus, ti panangawis iti ahensya ket panangrabngis iti dayaw ti unibersidad ken kadagiti Tomasino a mangilablabaan iti kinapudno.

Idi Nobyembre 5, nagiyaramid ti protesta dagiti estudyante iti kampus tapno irehisto ti panangbabalaw da iti NTF-Elcac ken iti porum. Numanpay napaatras ti NTF-Elcac, nagserbi latta a bisita ken tagapagsarita iti porum ti mangibagi iti National Security Council ken traydor a ni Arian Ramos idi Nobyembre 6. Nakipagdebate kenkuana ken timmakder kontra *Red-tagging* ti maysa nga aktibista iti UST.

**Isla ti Leyte, dinuprak
ti militarisasyon ti 802nd IB**

MANIPUD ENERO AGINGGA Oktubre tatta a tawen, saan a bumaba iti 99 a barangay ken 15 a munisipalidad iti isla ti Leyte ti dinuprak ti operasyon kombatan ti 802nd IB. Kabinnadang daytoy iti operasyon ti 14th IB, 93rd IB, 8th CMO Battalion ken pulis.

Iti prubinsya ti Leyte, adda iti 10 munisipalidad ti sinaklaw ti operasyon kombatan, kabilang ti Baybay City, nga idi Pebrero ket naikategorya nga Stable Internal Peace and Security Condition (SIPSC) tapno parwaren nga awanen ti pwersa ti hukbo ti umili iti lugar. Idi Setyembre, naipasidong iti hamlet ti Barangay Caraye idiay Javier, ken barangay Igang ken Hilapnitan idiay Baybay City.

Idiay Southern Leyte, lima a munisipalidad ti militarisado, kabilang ti Saint Bernard a naikategorya met a SIPSC idi Marso.

Segun kadagiti residente, tunggal adda iti baryo dagiti militar ket tuloy-tuloy ti pammutbuteng da. Pwersaan a pagawawiden dagiti soldado isuda manipud iti talon. Pangpangtaan da isuda nga arestaren ken ibalud nu agited da iti tulong iti hukbo. Pinasuko met ti militar dagiti paltog a pagananup dagiti residente.

Maysa kadagiti kaudyan a krimen ti militar iti isla ti panangkemmeg iti mannalon a ni "Loloy" a taga-barangay Masuganao, Mahaplag, Leyte. Ak-akusaran da isuna a kameng ti New People's Army.

Panaglabsing iti karbengan-tao idiay Panay ken Negros, agtultuloy

Agtultuloy a punpuntiryaen ti militar ken pulis dagiti mannalon iti isla ti Panay ken Negros kadagiti napalabas a lawas tapno kigtoten dagiti komunidad ken agimula ti terorismo.

Idiay Negros Occidental, pinatay ti militar ti babae a mannalon a ni Joan Escuadro idi Nobyembre 3 ti rabii. Sinerrek dagiti ahente ti militar ti balay na ken pinaltogan da iti asideg.

Idiay Bago City, agtultuloy ti panaglipit ti pulis ti Negros Occidental District Jail-Male Dormitory kadagiti balud pulitikal ken lider a limmaban iti panagabuso ti napadisi ngem nakasubli iti poder a ni warden Maj. Crisysrel Awe. Arbitraryo nga

naibartolina ni Lorenzo Perolino manipud Oktubre 26 ti malem.

Idiay Iloilo City, inaresto dagiti pulis ti agtawen 67 a ni "Mayok" iti Barangay Buntatala, Jaro idi Nobyembre 3. Napilaan isuna ti agtututon a kaso a kriminal ken maakakusaran a nangato nga upisyal ti rebolusyonaryo a tignay. Addaan isuna ti patong iti ulo a ₱2.55 milyon.

Kabayatanna, inaresto dagiti pulis ken militar ti organisador ti mannalon ken katutubo a ni Marlene

Espiritu bayat nga agbibyahe idiay Mabalacat City, Pampanga idi Nobyembre 1. Ak-akusaran da isuna a nangato nga upisyal ti NPA iti Central Luzon ken pinilaan da ti lima a kaso a kriminal.

Idiay Davao City, pinatawan ti Ombudsman ti 30-aldaw a suspensyon ti kapitan ti Barangay Bucana 76-A a ni Robert Olanolan idi Oktubre 20 gapu iti panaglaban na iti demolisyon idiay Kabacan ken Times Beach manipud Enero 2024. Sumangsango ni Olanolan ti reklamo a *grave abuse* nga impila ti DMCI nga agplanplano nga agitakder ti negosyo iti lugar.